



**La Wënd ka kō yāmb būmb ning y sēn tōe n maan
sara ne laa? Ad subhaanallaah fāa yaa sara, la
Allaahu akbaru fāa yaa sara, la Alhamdu lillaah yaa
sara, la laa'ulaaha llallaah yaa sara, sagl ne manegr
yaa sara, gıdg ned n yi yel-kiti yaa sara, yāmb yembr
fāa kēed-n-taar ne a paga yaa sara**

Yii a Abu Zarr nengē, (Wënd yard be a yīnga): Tı neb sēn yi Nabiyaamā Şahaabsē wā
(Wënd puusg la A tıgr be a yīnga), yeela Nabiyaamā (Wënd puusg la A tıgr be a yīnga):
Wënd Tēn-tuumā: ad arzēgsā rāmb looga ne keorā zānga, b puusda wala tōnd sēn
puusdā la b loe noor wala tōnd sēn loetā, la b leb n maand sara ne b arzēgsā sēn kellā,
t'a yeele: «La Wënd ka kō yāmb būmb ning y sēn tōe n maan sara ne laa? Ad
subhaanallaah fāa yaa sara, la Allaahu akbaru fāa yaa sara, la Alhamdu lillaah yaa sara,
la laa'ulaaha llallaah yaa sara, sagl ne manegr yaa sara, gıdg ned n yi yel-kiti yaa sara,
yāmb yembr fāa kēed-n-taar ne a paga yaa sara». La b yeel yā Wënd Tēn-tuumā, rē
yīnga tōnd yembr fāa na n wa n bao a yōor yamleoog ne a paga la a leb n tall keoore?
T'a yeele: «Yāmb ka ne t'a sā n rag ning-a haraamā pugē, a na n talla zūnuub laa? Yaa
woto bala, a sā n rık-a n ning halaalē wā me a tara keoore».

[Naşun Şahuhun (Gom-sikdem sēn manege)] [A Muslim n togs-a]

Şahaabsā tals sānda, b togsa b halhaalā la b talemđā Nabiyaamā (Wënd puusg la A tıgr be a
yīnga), la bāmb sēn ka tar arzēgs sēn na n maan doose, sēn na yıl n paam yel-sōm-wusgo
wala bāmb ma-biis sēn yaa ligdā rāmb sēn paam n maanā, tı bāmb me paam sōma wala
bāmb sēn maanā, bala b puusda wala bāmb sēn puusdā la b loet noor wala bāmb sēn loetā,
la b leb n rıkd b arzēg kelā b maan sara-rāmba, tı tōnd ka tar sēn maand ye! Tı Nabiyaamā
(Wënd puusg la A tıgr be a yīnga) wilgd-b bāmb me sēn tōe maane, sēn yaa sara-rāmba, tı
Nabiyaamā yeele (Wënd puusg la A tıgr be a yīnga): Rē yīnga Wënd ka maan n kō yāmb
būmb ning y sēn maan sara y mensē wā?! Ad yāmb sēn na n yeel: Subhaana-llaah) Yıgr be
ne Wēnde, yāmb paamda sara yel-sōmde, yaa woto bal la (Allaahu Akbar) Wënd n yuud ne
bedrem yeelgo yaa sara (Al-hamdu Lillaah) Pēgr be ne Wēnde, yaa sara, la (Laa'ulaaha
llallaah) la soab ka be tı sā n ka Wēnde, yaa sara, sagl ne sēn sōmb yaa sara, la gıdg yel-kiti
yaa sara, hal n tug n tāag yāmb ned fāa kēed-n-taar ne a paga yaa sara. Tı b maan yel-
solemd la b yeele: Wënd Tēn-tuumā, tōnd ned fāa na n wa maana a yōor yamleoogo n leb n
tar keoore?! T'a yeele: rē yīnga yāmb ka mi t'a sā n ning-a haraam pugē sēn yaa yoob la
zēng sēn ka rē, a ka tar zūnuub laa? Woto bala a sā n ning-a halaal pugē a tara yel-sōmde.

النجاة الخيرية
ALNAJAT CHARITY

